

Illumik pisinnermut atatillugu illup qanoq innera pillugu naliliinermik sanasoqartalernissaanut inatsisitigut piumasaqaateqartalernissamut atatillugu aningaasatigut iluaqutissanik ajoqutaasunillu misissuisoqarnissaa pillugu kiisalu illumik pisinnermut atatillugu illut nukimmik atuisarnerat pillugu nalunaaqutsiisarnissap inatsisitigut piumasaqaatalernissaanut atatillugu misissuisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut.

Aamma misissuinermi ilanngullugu paasiniaqquneqarpoq sillimmasiisarfiit piginnittut nikinneranni suleqataanissaminnut piumasaqaatigisinnaasaat kissaataallu. Misissuinerup inerneru Inatsisartunut agguanneqassaaq 2017-imi ulloq 1. januaari tikitsinnagu.

(Inatsisartuni ilaasortaq Justus Hansen, Demokraatit)

Akissuteqaat

(Ineqarnermut, Sanaartornermut Attaveqaqatigiinnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasortaq Justus Hansen aalajangiiffigisassatut siunnersuuteqarneranut qutsavigerusuppara.

Naalakkersuisut isumaqarput, siunnersuummut matumunnga danskit pigisanik il.il. aalaakkaasunik pisinnermi atuisut illersorneqarnissaat pillugu inatsimmut nalunaarutaat, kiisalu danskit illut nukissiuutinik atuinerannut nalunaarsuisarneq pillugu inatsisaat tunngavigineqartut.

Illut qanoq issusaannik nalunaarusiat illunik immikkut ilisimasallit illumi immikkoortunik tamanik misissuinerisa inernerinik imaqartarput. Ajoqutit/amigaatit ersittut qanoq issutsimik nalunaarusiamut allanneqartarput, tassanilu illup, illunut taamatut pisoqaassuilinnut naleqqiullugu pitsaassusia aamma naliliiffigineqartarpoq.

Tassalu pisisussap pisinissamut isumaqatigiissuteqannginnerani qanoq issutsimik nalunaarusiaq ajoqutaasinnaasunut/amigaataasinnaasunut takussutissiisarpoq. Tamatuma saniatigut illumik misissuineq qanorlu issutsimik nalunaarusiaq pisisussap piginnittut nikinnerannut sillimmasiisinaaneranut tunngaviliisarput.

Piginnittut nikinnerannut sillimmasiissut atorlugu pisisoq ajoqutinik/amigaatinik ersinngitsunik, illup tiguinissaa sioqqullugu pilersimasutut uppersarneqarsinnaasunik, aammalu pisinnermut isumaqatigiissutip atsiorneqarnerani pisisumit ilisimaneqanngitsunik paasissutissiissutigineqanngitsunilluunniit iluarsaassinissamut aningaasartuuteqarnerunissamut illersorneqarsinnaavoq. Tamatuma peqatigisaanik tunisisoq ajoqutinut ersinngitsunut nalinginnaasumik akisussaasutut inissinneqassanngilaq.

Qanoq issutsimik nalunaarusiortarnermut aammalu piginnittut nikinneranni sillimmasiisarnermut pigisanik aalaakkaasunik pisinnermi atuisut illersorneqarnissaat pillugu danskit inatsisaat tunngavigineqarpoq. Inatsit, ilaatigut aamma qanoq issutsimik nalunaarusiornerup amigaateqarnerani ajoqutinut taarsiinissamut piumasaqaateqarnissamut aalajangersakkanik imaqartoq kunngikkormiut peqqussuteqarneranni Kalaallit Nunaanni atuuttussanngortinneqarsinnaavoq.

Illuni nukissiuutitut sipaaruteqarnissap siuarsarneqarnissaa pillugu danskit inatsisaat malillugu illut tamarmik tunineqarnerminni nukissiuutit atuerat pillugit nalunaarsorneqartussaapput. Inatsit taanna aamma nalunaarsuinerup taamaallaat suliffeqarfimmit inummilluunniit, inatsimmi taaneqartumit, tamatumunnga pisinnaatitaaffiligaasumit isumaqatigineqartussaananut aalajangersakkanik imaqqarpoq. Inatsit Kalaallit Nunaannut atuutinnilaq.

Nukissiuutit atueq pillugu nalunaarsuineq illup nukissiuutit atuerata qanoq issusianik oqaluttuuartuvoq, aammalu qanoq iliorluni nukissiuutit atuermit sipaagaqartoqarsinnaananut innersuussutaalluni. Paasissutissat taamaattut illumi pisiniarluni eqqarsaateqartumut ilisimassallugit soorunami iluaqutaasussaavoq.

Ataatsimut isigalugu siunnersuut inatsisinut pisariusunut annertuumik kalluaasuvoq, ilaatigut ukununnga tunngasunut:

- Pigisanik aalaakkaasunik inuussutissarsiutigalugu niueqatigiinneq
- Pigisanik aalaakkaasunik pisinermit atuisut illersorneqarnerat
- Qanoq issutsimik nalunaarusiortarneq piginnittullu nikinnerannut sillimmasiisarneq
- Illut nukissiuutit atuerannik nalunaarsuisarneq

Ilisimatitsissutigisinnaavara, Naalakkersuisut maannarpiq inatsisunik, pigisanik aalaakkaasunik inuussutissarsiutigalugu niueqatigiinnermut maleruagassiuffiusunik suliaqarnissamik pilersaaruteqanngimmata, kisiannili Naalakkersuisut 1. januar 2017 nallertinnagu misissuinissat siunnersuutigineqartut ingerlannissaannut piareersimapput.

Taamatut oqaaseqarlunga aalajangiiffigisassatut siunnersuut Inatsisartuni kajumittumik suliarineqartussanngorlugu tunniuppara.